




毘尼止持會集

清金陵寶華山弘律沙門讀體集

毘尼止持會集



清刻龍藏佛說法變相圖

序

謙一

夫毘尼是正法之壽命者蓋由戒淨僧真性
 遮之業而無染覆道弘德備權實之教而克
 闡揚自行利他越苦海而登彼岸紹先啓後
 續慧命以振立猷故曰毘尼住則正法住也
 不然則五邪罔禁八穢殉身虧僧寶之尊稱
 失福田之淨德上無模楷下闕規繩縱能聚
 衆匡徒悉屬附法魔外欲令正法久住豈可
 得乎體艱繫荒隈學漸往哲謬承先囑力樹
 戒幢因念律海汪洋學人難討爰搜諸部之
 精要詳明止持之大成雖未盡源庶幾便覽
 所冀同志諸賢須遵七聚嚴護以防非當欽
 四依知足而進道則五濁世戒香芬馥於大
 地六和衆法雨霈澤於人間所謂毘尼住世
 則正法住世不亦然乎

時

順治己丑年前安居日滇南鷄足苾芻讀體

識於寶華山之觀西軒

毘尼止持會集

凡例

一律分眾部起自異執哲人弘範理合融
收按舍利弗問經中舍利弗言如來正
法云何少時分散如是既失本味云何

奉持少時者謂佛滅
度三四百年中佛言摩訶僧祇其

味純正其餘部中如被添甘露諸天飲
之但飲甘露棄於水去人間飲之雨露
俱進或時消疾或時結病其讀誦者亦
復如是多智慧人能取能捨諸愚癡人

不能分別文是知諸部之分出乎異見

取捨之法識自聖言故茲集雖以曇無

德部為宗然於他部互有發明者悉採

用之此亦南山律祖集大成之式也問

既云摩訶僧祇其味純正何不宗之反

宗四分豈非飲添水之甘露耶答茲藏

中四十卷之僧祇者上古諸師皆判為

略本故所不宗蓋文少義闕而又不合

二百五十戒數故也今宗曇無德四分

律者蓋是南山聖師之所宗故自唐以

降皆弘通故二百五十戒相悉具足故

捷度有歸無紊亂故余今宗之復何疑

焉

律制嚴詳譯文重沓初機簡閱不無浩

繁之歎今為便覽故節要文然於義理

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件宣传广告页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



并無增損^{錄一}

一戒因事制有緣方興故於條下先出犯緣須知栴檀林中曾無散木靈山會上豈有凡夫斯皆大權示現密護僧倫請佛制戒助揚法化如閱讀者當生欽信慎勿眇視以取慢尤故善見毘婆沙律云若長老聞此不淨行慎勿驚怪何以故如來憐愍我輩為結戒故說此惡言若不說者云何得知波羅夷偷蘭遮突吉羅若法師為人講聽者慎勿露齒笑若有笑者驅出何以故佛憐愍眾生金口所說汝等應生慚愧心聽何以笑

一諸部翻譯音雖不同義實無別由其五天各異語有重輕今皆倣古所述或註文下或贅卷末以省檢討

一五篇戒相各有根本等流性罪遮罪並所起煩惱性謂本性是罪遮謂因制方犯又性罪惟染心中作若遮罪通染不染惟薩婆多論明其本流獨善見律判其性遮據律攝中出煩惱今於每戒下有無咸依藏錄一無私增若唯義推例亦可曉

一每戒之下約有八科一制戒緣起二依律釋文三結罪重輕四兼制餘眾五應機隨開六會採諸部七經論引證八附事便考然此八科有無不定臨文自見至於戒條正文書皆頂格餘者俱下一字若用本部但標律云或第幾分等字若用他部則別標名以識之便於稽考

藏函

一律有止作二持止持惟顯開遮之法作持方攝誦戒之規有依佛陀耶舍所譯說戒別本而成集者斯乃用別集廣止作不分今此集專覈止持一門故但明二百五十戒相所以卷首不錄布薩偈文和白等法至於作持說戒篇中自當錄附釋之庶無糅於止作也

一經通餘說律唯佛制等覺已下猶非所堪況諸小聖輒敢措詞良以如來行果極圓窮盡衆生輕重業性是故毘尼唯佛制立自餘下位但可依承不同經論許容他說故余欽此無敢穿鑿釋義出事皆如律藏成文重治輕開咸遵金口所說

綱要

一經教利生普被諸有或在天上龍宮或居祇園鷲嶺或在王臣舍宅或於曠野林泉惟觀根器應緣化導凡從聽者曾無遮揀律則不爾若於他處有犯必在僧中結戒縱尼有漏制亦憑僧一則今諸比丘慚愧欽遵謹護無作次則遮障外人恐生譏嫌不敬僧倫是故毘尼乃佛內制獨大僧持猶如國王秘藏匪許外臣所知若白衣沙彌設先覽者後欲登壇不聽進具由犯賊住是名重難所以戒因緣經序云天竺持律不都通視唯諸十二法人堅明之士乃開緘滕而共相授耶舍見囑見誨諄諄人可使由之不可使知其言至切乃自是也文通來義學兼講僧律不揀白衣沙彌槩容

謙一

五

坐聽雖云法施實為犯法欺侮嚴制罪將焉逃所冀凡為師承及居上座若睹白衣沙彌翻閱律部並此集者當慈語教誡使勿披覽此則自他俱利法道可昌

一戒德難思功逾衆行初因極果以為元基淨邦樂報以為根本險途示迷此為良導苦海得濟此為舟航由是賢聖所修諸佛所證乃至人天暫樂惡道永離無越乎戒故我釋迦世尊始自鹿苑終於鶴樹五時所演一大藏教多讚戒法不特一佛推重毘尼即十方三世一切如來出現利生說法皆然若離戒修行冀超三界猶無足欲行無翹欲飛無船欲渡詎可得也

一戒有三種果因互成論得不同據用則共謂第一波羅提木义戒即律儀戒第二禪戒即定共戒定是靜攝入定之時自然三業調善諸惡不起第三無漏戒即道共戒道是能通發真以後自無毀犯如初果耕地蟲離四寸是道共力此二戒法既是心上勝用力能發戒道定與律儀並起故稱為共今毘尼藏正詮律儀亦攝定道由持淨戒禪定智慧功德發生則律儀為因定道為果由禪無漏力性業遮業悉得清淨則木义為果定道為緣故律中令諸比丘增心增慧薩婆多論云此波羅提木义戒若佛出世則有佛不出世則無禪無漏戒一切時有波羅提木义戒從教而得禪無漏

謙一

八

戒不從教得又波羅提木义戒但佛弟子有禪戒外道俱有夫能維持佛法有七衆在世間三乘道果相續不斷盡以波羅提木义而為根本禪無漏戒不爾是故於三戒中最高為殊勝

一持律者須知輕重開遮決斷疑悔始令正法久住不斷故第四分云有五法名為持律一知犯二知不犯三知輕四知重五廣誦二部戒又五法四如前五廣誦毘尼又五法四如前五謂住毘尼而不動又五法四如前五諍事起善能滅除又善見律云律師有三法一本毘尼藏謂為律師者必本於毘尼諷誦通利句義辯習文字不忘然後可以教授於人所以稱之為律師也二堅持不雜謂

為律師者當懷慚愧堅持法律於毘尼藏所有文句義疏悉皆通達若有問者次第而答不相雜亂所以稱之為律師也三受持不忘謂為律師者於毘尼藏所傳之師須知次第授受之由若佛授謙一優波離如是次第師師相承乃至於今其名字或能盡知或知一二而不忘失所以稱為律師也

一比丘戒相雖曰小乘然學大乘者未有不遵故南海寄歸云大乘小乘律檢不殊齊制五篇通修四諦若禮菩薩讀大乘經名之為大不行斯事號之為小所云大乘無過二種一則中觀二乃瑜伽中觀則俗有真空體虛如幻瑜伽則外無內有事皆唯識斯並咸遵聖教孰是

孰非同契湮槃何真何偽意在斷煩惑
濟衆生豈欲廣致紛紜重增冗結依行
則俱昇彼岸棄違則並溺生津西國雙
行理無乖競又云浮囊不洩乃是菩薩
本心勿輕小愆還成最後之唱理合大
小雙修方順慈尊之訓防小罪觀大空
攝物澄心何過之有或恐自迷誤衆准
教聊陳一隅空法信是非虛律典何因
見慢

一今所集卷專為初學若為師者切莫樂
簡厭繁謹閱斯帙為盈須覽全藏博究
二持庶可高樹戒幢大振法鐸苟未徹
諸急欲師人多乖聖制律有大呵

毘尼止持會集卷第一

清金陵寶華山弘律沙門讀體集

將明斯律依賢首宗畧開七門一教起因緣二藏乘所攝三教義通局四辨定宗趣五教所被機六總釋題目七別解戒相所言門者收攝謙一無壅名之為門俾依門入解通達無滯凡所釋義則有所宗歸也

初教起因緣者有通有別所言通者謂如來惟為一大事因緣出現於世則一代時教總其大意惟欲眾生開示悟入佛之知見今此律者欲令眾生以波羅提木叉戒入佛知見故故謂之通

別則專就此律復有十義為教起所因一攝取於僧二令僧歡喜三令僧安樂四未信者令信五已信者令增長六難調者令

調順七慚愧者得安樂八斷現在有漏九斷未來有漏十正法得久住一攝取於僧者謂於世人眾姓之內若有篤信男女等入正法中深生敬信樂為必芻以成僧眾令取僧寶果故

二令僧歡喜者律攝云為僧伽極善謂既入善說法

律之中而知僧尊堅固道志暢悅持戒蕩滌凡情能令善法極增勝故

三令僧安樂者謂依禁戒清淨活命三慧自淑五邪不干以七法財還信施債德業

漸增不為施所墮故謙一

四未信者令信者謂持禁戒性遮清淨四儀整肅譏誚不興令未信者知歸佛道使邪見輩正信發生故

五已信者令增長者謂嚴淨律儀梵行可

軌如教化利慈威可欽能令久淹佛法者
景仰歸從愈增淨信故

六難調者令調順者律攝云為折伏惡人謂有一類

名字比丘及一類雖具信心煩惱業習強

者今以輕重律儀諫治調伏令知非自責

隨順眾僧故

七慚愧者得安樂者謂清淨律儀調難調

者令知足慚愧樂持戒僧一界六和身心

無擾得適悅進道故

八斷現在有漏者謂諸惡發業皆由潤生

今以淨戒防止功用能遠現行乾枯業種

不起煩惱斷除苦因故

九斷未來有漏者謂依淨戒定慧發生心

無染污永斷漏種不受後有得證僧寶果

故

十令正法久住者謂令清淨僧寶種性相

續不息如法宣說廣利人天展轉相教正

法得以久住故以上別中十義皆准律攝

釋者是為此教結制之因 薩婆多云如

來以此十義結戒者順此十利功德得此

十利功德若持一戒將來得一戒果報兼

得十利果報如是一切戒當分別而非一

切通得此十利功德也初明教起因緣竟

二藏乘所攝者已知此戒有如是因未審

藏乘之中各何屬攝兼一先明藏攝次明乘攝

先明藏攝者有二一三藏二二藏且初三

藏者

一修多羅或云修妬路亦名素咀纜此翻

契經契者契理契機經者以貫攝為義貫

謂貫穿所應知義攝謂攝持所化之機故

此教於三學中所詮定學 二毘奈耶此
翻調伏謂調練三業治伏過非亦名鼻奈
耶鼻翻去奈耶翻真去若干非而就真故
曰真也降伏此心息此心忍不起故曰真
也降伏戒也息定也忍智也亦名毘尼翻
滅又云調御使心行調善也此教於三學
中所詮戒學 三阿毘達磨蘊云阿毘曇
訛也阿毘是對義達磨法義合言對法謂
能對者是妙慧通漏無漏所對者是法通
世出世法此慧對向涅槃法復能對觀了
四諦法法之所對故名對法此教於三學
中所詮慧學梵語比吒此云藏即包含攝
持之義非藏無以積錢財非藏無以蘊文
義故上三典皆名曰藏今此戒者正屬毘
奈耶藏非如他經分攝故

謙一

十一

二藏者一菩薩藏二聲聞藏不列緣覺者
攝歸聲聞故今此戒者正屬聲聞藏亦分
攝菩薩藏蓋聲聞人未發大心容可不學
菩薩戒而菩薩人未有不學聲聞戒故
次明乘攝者乘有五乘一人二天三聲聞
四緣覺五菩薩乘者運載為義通教理行
果謂依教解理依理起行依行證果行果
正運教理助運五皆名乘由力有大小載
有遠近故分為五 一人乘者涅槃經云
多思慮故名雜心論云意寂靜故名入
謂受三皈五戒修下品十善運載衆生越
於三途生於人道其猶小艇繞過溪澗
二天乘者俱舍論云光潔自在神用名天
謂受持三皈五戒修中品十善非定相應
運載衆生越於四洲生欲界天與四禪定

相應生色界天與四空定相應生無色界天猶如小船越於江河 三聲聞乘者聲謂佛音聲聞謂耳根發識聽聞佛聲四諦之法故名聲聞 四緣覺乘者以慧覺了十二因緣之法亦名獨覺謂出無佛世雖不稟至教自悟無生故名獨覺修四諦十二因緣法門皆能運載衆生越於三界到有餘涅槃成阿羅漢及辟支佛皆如大船越大江河 五菩薩乘者梵語具云菩提薩埵菩提覺義薩埵有情義合言覺有情以悲智為本修六度法門運載衆生越於三界三乘之境至無上菩提大般涅槃之彼岸如乘大舶越於大海今此戒者正攝聲聞乘非餘乘所攝二明藏乘所攝竟三教義通局者已知藏乘所攝如是未審教

義當復云何其中分二初約教局論次推義通論

初約教局論者世尊一大時教有稱性隨機權實開會方便演說義各淺深今依賢首所判不出五教 一小教此教以隨機故但說人空不說法空縱說法空亦不明瞭但依六識三毒建立染淨根本唯論聲聞乘故名為小教 二始教由第二時但明於空未盡大乘法理故名之為始第三時定說三乘不言定性聲聞無性闡提成佛故亦名分教於中廣說法相少說法性所說法性亦是相數是大乘之初門故曰始教 三終教言定性聲聞無性闡提悉當成佛方盡大乘至極之說名之為終以稱實理亦名為實於中少說法相多說法

性雖說法相亦會歸性是大乘終極名為終教 四頓教此教明一念不生即名為佛不依地位漸次而說名之為頓於中不說法相唯明真性一切所有唯是妄想一切法界唯是絕言名為頓教 五圓教此教所說唯是無盡法界性海圓融剎塵無礙即華嚴所談名為圓教今此戒相正為衆生癡所覆故遂起貪瞋邪見十使縈纏汨沒四流昇沉九地是以六識三毒為染根本故如來愍此為制毘尼令治伏三毒防護七支修生空觀斷分別俱生二種我執超越三界證阿羅漢果是為六識反染而為淨根本義屬小教正阿含攝非餘四教故曰局也

次推義通論者謂此戒相雖曰小教若以

義推則通乎圓故法華玄義云開羅者毘尼學即大乘學式義式即大乘第一義光非青黃赤白三歸五戒十善二百五十皆是摩訶衍豈有羅戒隔於妙戒戒既即妙人亦復然汝實我子即此義也 蓋圓人受法無法不圓一色一香無非中道低頭合掌悉是道場孰曰戒相而非圓頓且如來化緣事畢仍遺教云汝諸比丘於我滅後當尊重珍敬波羅提木叉如闇遇明貧人得寶當知此戒則是汝等大師若我住世無異此也斯乃開顯之後顧命之言必局小教豈其然乎三明教義通局竟四辯定宗趣者已知教義通局如斯未審宗趣當何所取宗者言之所尚曰宗趣者宗之所歸曰趣亦有總別

總則此毘尼教以反染成淨止作為宗以盡諸有漏解脫為趣按薩婆多論云比丘二百五十戒一切衆生上各得七戒以義分別有二十一戒如一衆生上起身口七惡凡起此惡以三因緣一以貪故起二以

謙一

十四

瞋故起三以癡故起此三惡三七二十一惡反惡心得戒一衆生上得二十一戒色一切衆生亦復如有五種子中破一粒麥損一粒粟斷一根果摘一枝葉隨所斷所破各得一罪隨得罪處反罪得戒得爾所戒本受戒時不殺一切草木一切草木上盡得戒色如不掘地一微塵上得一戒色三千大千世界下至金剛地際一一微塵上得一戒色如是二百五十戒中若衆生非衆生類上得戒多少以義而推可以

類解文若非遵制防止則不能增定慧淨諸有漏若非如律作辦則不能反惡業而成淨戒故漏盡解脫即獲果證是故反染止作漏盡解脫正是今教中所崇所尊所主之宗趣也

謙一

十五

別則互舉若舉法為宗令得人為趣謂律藏所詮雖意皆明了須待比丘信敬躬行以辯深義是其所趣若舉人為宗令知法為趣謂具信登壇雖名為僧寶須當精窮五篇徹究二持知其所歸四辯定宗趣竟五教所被機者宗趣既辯已知所歸未審此教所被何機是故再明教所被機教乃聖人被下之言機是依教修行之士教分有五准前所明機別有三謂上中下而於

者謂開化指示權實性相善惡因果化導之機通在家出家今此毘尼非彼化教唯是制教制約行業制善令行制惡令斷示持犯相明諸學處所被之機不通在家獨制僧徒正被中下之機亦可兼於上者故今分三一正被二隨被三漸被 一正被者毘尼總收二部一制比丘僧二制比丘尼僧比丘僧始自須提那子以降具足二百五十禁章比丘尼僧緣從憍曇彌八敬以來三百四十八戒漸備其僧部中攝尼而尼部中攝僧間有同制別學同制同學蓋由僧尼性習各殊故佛於正被中復異也 二隨被者式叉摩那沙彌沙彌尼此三雖曰小衆居必依隨二僧食隨僧分法隨僧學是故二僧戒內於後俱隨有制但

令知惡莫作是制當遵若犯輕重條章通云一突吉羅仍有擯懺故悞不同名之小三衆隨律威儀所謂兼制今故為隨被也 三漸被者漸謂漸次若有上根稟戒機非中下本為志求佛果不似耽樂寂滅由遵聖制楷定律規不躡僧寶以故先秉息慈次入僧數然後方圓菩薩三聚淨戒是知聲聞身戒即菩薩心戒之基菩薩心戒即聲聞身戒之本未有身戒不淨而欲心戒清淨者也所以圓通會上波離尊者云

謙

去

我以執身身得自在次第執心心得通達然後身心一切通達得證圓通故今以上根次第稟戒而攝漸被中也五明教所被機竟

六總釋題目者前五義門已知今當釋題

就中分四初出律藏源流二明五部所弘
三釋四分戒本四釋止持會集也

初出律藏源流者審夫娑羅唱滅之後豐
德結集之初五百漏盡比丘僧同於畢鉢
羅窟內大迦葉白僧問法優波羅依制讀

宣誦如來言詞滿八十因而號曰八十誦
律原無眾部之殊其分張眾部者蓋自惡
王滅法之後復有善王重興佛教羣黨互
爭故分二部從二部中復分十八久後流
傳惟餘五部此則八十誦律是為鼻祖二
部為支分十八五部是其派衍也按舍利
弗問經云云何世尊為諸比丘所說戒律
或開或遮後世比丘比丘尼等云何奉持
佛言如我言者是名隨時在此時中應行
此語在彼時中應行彼語我尋泥洹大迦

謙一

二七

葉等當為分別為比丘比丘尼等大作依
正如我無異此懸記迦葉五百結集也又云後有孔雀
輸柯王孫名弗沙蜜多羅滅我法教害我
僧徒彌勒菩薩以神通力接我經律上兜
率天得蟲行神捧山壓王及四兵眾王種
四兵一時滅盡後有王出性甚良善彌勒
菩薩化作三百童子下於人間以求佛道
從五百羅漢諮受法教羅漢上天接取經
律還於人間國土男女復共出家比丘比
丘尼還復滋繁時諸比丘好於名聞極力
諍論抄治我律開張增廣互相是非求王
判決王集二部行黑白籌此乃息諍之法若要舊
者可取黑籌若要新者可取白籌時取黑
者多白者少王以皆是佛說好樂不同不
得共處學舊者多從以為名為摩訶僧祇

也學新者少而是上座從上座為名為他

俾羅也此懸記律分二部也又文殊問經云世尊入

涅槃後未來弟子云何諸部分別云何根

本部佛言未來我弟子有二十部能令諸

法住二十部者並得四果三藏平等無下

中上譬如海水味無有異如人有二十子

真實如來所說文殊師利根本二部從大

乘出從般若波羅蜜出初二部者一摩訶

僧祇此言大眾老少同會共集律部也二體毘履此言老宿人同會共

出律部也我入涅槃後一百歲此二部

當起從摩訶僧祇出七部於此百歲內出

一部名執一語言所執與僧祇同故云一也於百歲內

從執一語言部復出一部名出世間語言

稱讚辭也於百歲內從出世間語言出一部名

高拘梨柯是出律主也於百歲內從高拘梨柯

謙一

十八

出一部名多聞出律主有多聞智也於百歲內從多

聞出一部名只底舸此山名出律主居之於百歲內

從只底舸出一部名東山亦律主居也於百歲

內從東山出一部名北山亦律主居也此謂從

摩訶僧祇部出於七部及本僧祇是為八

部於百歲內從體毘履部出十一部於百

歲內出一部名一切語言律主執三世有言也此即五部

於百歲內從一切語言出

一部名雪山亦律主居也於百歲內從雪山出

一部名犢子律主姓也此即五部中之婆蹉富羅部於百歲

內從犢子出一部名法勝律主名也於百歲內

從法勝出一部名賢律主名也於百歲內從賢

部出一部名一切所貴律主為通人所重也於百歲

內從一切所貴出一部名苾芻律主居也於百

歲內從苾芻山出一部名大不可棄律主初生母棄

之於井父追尋之維墜不死故云不可於棄又名能射此即五部中之彌沙塞部

百歲內從大不可棄出一部名法護律主名也

此即五部中之於百歲內從法護出一部名之曇無德部

迦葉比律主姓也此即五部中之迦葉維部於百歲內從迦

葉比出一部名修妬路句律主執修妬路義也此謂

體毘履部出十一部及體毘履成十二部

佛說此祇夜摩訶僧祇部分別出有七體

毘履十一是謂二十部十八及本二悉從

大乘出無是亦無非我說未來起此上經文乃懸

記從二部中復分十八部也獨中言無是亦無非者惟華嚴會立記云謂以隨情

執故無是四諦等更無異說故無非或但各自言是豈名實是故云無是各互非他

豈名實非故云無非又既皆從大乘出何有是非或可依之修行無不獲益故云無

是非無又南海寄歸傳云諸部流派生起

不同西國相承大綱唯四一聖大眾部分

出七部二聖上座部分出三部三聖根本

說一切有部分出四部四聖正量部分出

四部亦是從本分其間雖分出沒部別名

字事非一致此不繁述 又俱舍論云過

去迦葉佛時佛父訖栗枳王夢見一衣豎

而且廣有十八人各執少分四向爭挽衣

猶不破因問彼佛佛言此表當來釋迦如

來弟子分佛正法成十八部雖有異執而

真法尚在依之修行皆得解脫文是知部

雖多分義皆可取若欲細覈各所宗執當

閱十八部論部執異論異部宗輪論此三北藏傳字亟

二明五部所弘者諸部流分雖有十八其

可入行不過五部按翻譯名義集云世尊

成道三十八年赴王舍城國王食訖令羅

云洗鉢失手撒鉢以為五片諸比丘白佛

佛言鉢破五片表我滅後毘尼分為五部

也又舍利弗問經佛言部分如是眾多久

後流傳唯餘五部各舉所長名其服色摩

訶僧祇部勤學眾經宣講真義以處本居

中應着黃衣今律四十卷是其支分也曇無屈多迦即曇

無德通達理味開導利益表法殊勝應着赤

色衣薩婆多部此云一博通敏達以導法切有

化應着皂衣說一切有部皆此部攝迦

葉維部此云重空觀精勤勇猛攝護眾生應着

木蘭衣律止有解脫戒本一卷或云彌沙全部未至或云未曾翻譯

塞部此云不着有無觀禪思入微究暢幽密應着

青衣有五分律三十卷據此經文即此五部若准

他經凡列五部皆無摩訶僧祇部却有婆

蹉富羅部此云積于上古有仙染積生子自後種姓皆名積于其彼部律

未至如賢首疏云總別六部僧祇是總五部

疏一

是別此摩訶僧祇部行解虛通不生偏執

徧順五見以通故故知摩訶僧祇是總五

部是別通則六部也今此方唯存四部缺

迦葉維及攢子部其餘善見毘尼母薩婆

多論摩得勒伽優波離問經等俱是諸部

支屬皆可覽也然斯五部既佛預記無勞

致疑有所是非譬如一燈出百千燈雖燈

隨物異而光照無殊至於破闇除冥功用

則一是故五天諸國隨宗一律各競進業

皆獲道果東夏傳來四部俱行精持戒軌

咸躋聖域自非聖化通立何以使之然乎

故別舉五部明其所弘也

三釋四分戒本者已知部彙固多行唯五

部未審今者所弘何部故次明之中復分

四一出宗主二釋四分三釋律義四出譯

謙一

時

一出宗主者此四分宗主名曇無德此翻法藏又云法密由師舍容正法如藏之密故又云法護護者防護即密藏義也師乃采菽氏之裔體毘履之支

二釋四分者此律全部有六十卷分為四大分自首卷至二十一卷止名第一分其中所明比丘二百五十戒法自二十二卷至三十六卷止名第二分前之九卷乃明比丘尼三百四十八戒法後六卷明受戒犍度說戒犍度梵語犍度此翻法聚以相類之法聚而歸一也自三十七卷至四十九卷止名第三分其中所明安居自恣皮革衣藥迦絺那衣拘睨彌瞻波呵責人覆藏遮破僧滅諍比丘尼法法共十六犍度

自五十卷至六十卷終名第四分其中所明房舍雜法五百結集七百結集調部毘尼毘尼增一共六犍度今於四分之中單明第一分比丘戒法也

三釋律義者一大制教通名毘尼五部所

出通名曰律梵語毘尼此翻滅然滅有三

義一滅業非謂不殺盜等故律中二滅煩

惱煩惱是發業之本故律云調伏貪三得

滅果故經云戒淨有智南山云毘尼翻調

伏及滅者是從功用為名非正譯也正翻

云律律者法也謙一從教為名斷割重輕開遮

持犯非法不定俗有九流法流居一故世

律法皆約刑科道與俗違刑名乃異至於

處斷必依常法故翻毘尼為律也

四出譯時者此四分律乃姚秦時北天竺

罽賓國佛陀耶舍尊者共竺佛念所譯緣
 佛陀耶舍先於本國誦四分律不賈梵本
 而來秦司隸校尉姚爽欲請尊者譯出姚
 主以其無梵本難可證信眾僧多有不同
 故未許之羅什法師勸曰耶舍甚有記功
 數聞誦習未曾脫誤於是姚主即以藥方
 一卷民籍一卷並可四十紙許令其誦之
 一日便集僧執文覆之乃至鉢餽人數年
 記不謬一字是時眾咸信伏由是耶舍口
 誦梵音佛念筆受成文即以弘始十二年
 譯出為四十五卷又云四十四卷今分為
 六十卷若支法領所譯者止有三十卷然
 今已失矣據唐圓照律師傳則弘始五年
 壬寅歲耶舍譯出成四十五卷至十一年
 歲次戊申支法領又從西國將梵本來於

謙一

三三

長安中寺重警校殆十四年辛亥譯畢成

六十二卷

四釋止持會集者宣祖云持戒之心要唯

二轍止持則戒本最為標首作持則羯磨

結其大科後進前修妙宗斯法故今統閱

諸部撮畧正文會集止持用益將來共扶

頽幢以樹正法也六總釋題目竟

毘尼止持會集卷第一

音義

序

匏繫 上音庖 馱屬益 匏味苦 馱味甘也 言
 而不食大約今人用匏 匏荒隈 下音威 屋內
 繫皆取無用之義也 荒隈 曰隈 屋外曰
 隈 荒隈者謂之 玄猷 下音由 五邪 一詐 現異
 居於荒山也 玄猷 道也 五邪 相謂諸比
 丘違佛正教於世俗人前詐現奇特之相
 今其心生敬仰而求利養 二自說功德
 謂諸比丘以辯口利詞抑人揚己自逞功
 能今所見者心生敬信而求利養 三占

相吉凶謂諸比丘攻學異術卜命相形講
 談吉凶而求利養四高聲現威謂諸比
 丘大語高聲詐現威儀令人畏敬而求利
 養五說所得利以動人心謂諸比丘於
 彼得利於此稱說於此得利於彼稱說今
 人動心而求利養如是五種令人邪命
八穢 一置買田宅謂比丘當依眾居止勤
 以圖自足是為不淨二種植根栽比丘
 當勤修道業於世間資生之事不生貪著
 若不為眾私自種植田園內妨行業是為
 不淨三貯聚穀粟謂比丘當乞食資身
 清淨活命若不為眾私自貯聚粟米參
 是為不淨四畜養奴婢謂比丘當閉居
 靜處修攝其心行安樂行若不為眾畜養
 奴婢驅使作務是為不淨五畜養羣畜
 謂比丘當持禁戒慈心不殺若畜牛馬等
 尊生之類以汚梵行是為不淨六藏積
 金銀錢寶謂比丘當以清雅為高安貧樂
 道身無長物若貪積世間所重金銀資財
 等物資生求利計算出納有乖道行是為
 不淨七藏積象牙刻鏤等物謂比丘當
 奉佛戒志尚儉素於諸玩好心不貪戀布
 衣草座常懷知足若貪世間稀有的飾之
 物是為不淨八藏積銅鐵金銀或以自煮
 費謂比丘於眾居止當與眾同餐或乞食
 自活勵精梵行成就道業若藏積金
 獲以自煮費背眾而食是為不淨
福田淨德 勇猛心脫離凡俗習佛菩提
 也

而能懷佩妙道為世福田是為初淨德也
 二毀其形好謂出家之人剃除鬚髮毀
 壞相好去世俗之塵衣著如來之法服具
 佛威儀為世福田是為第二淨德也三
 永割親愛謂投佛出家割絕父母親愛之
 情一心精勤修道以報父母生成之德兼
 能為世福田是為第三淨德也四委棄
 軀命謂出家之人能委棄身命無所顧惜
 惟務一心求證佛道兼能為世福田是為
 第四淨德也五志求大乘謂出家之人
 常懷濟物之心專志勤求大乘之法度脫
 一切有情為世福田是為第五淨德也
模楷 模木生於周公塚上其葉春青夏赤
 子深上其餘枝疎而不屈以質得其直
 也此二字取義若正與直可為法則
芻 此香草也出於雪山具有五德以喻此
 芻一體性柔緩以喻比丘能折伏身語
 意業之羶也二引蔓旁布以喻比丘傳
 法度人延綿不絕也三馨香遠聞以喻
 比丘戒德芬馥為眾所聞也四能療疼
 痛以喻比丘能斷煩惱毒害之痛也五
 不背日光以喻比丘正見
凡例 思惟常向佛日而不背也
經通餘說 大智論云一佛說謂如來金口
 菩薩承佛神力加被所說三仙說謂佛會
 中諸大仙人從佛入道誓弘佛化宣揚正

法四諸天說謂帝釋每於善法堂上為伺
利天人演說般若五化人說謂三乘聖人
隨機現化如羅睺羅化作金輪王而度城
東老母先讚福果因緣後說大乘妙法
等覺已下 今願勸菩薩是也下地望之難
與佛等然有極細一品無明未盡故措
猶稱菩薩言下者指下位九地三賢措
著也

綱要

據

三五

十二法人

即頭陀十二行也又名杜多此
翻抖擻亦翻修治亦翻澆汰十
二法者一住阿蘭若處二常乞食三次第
乞食四受一食法五節量食六中後不飲
果漿蜜漿七著糞掃衣八但三衣九塚間
住十樹下止十一露地坐十二但坐不卧
緘膝 謂束篋之緘膝也 **人可使由之不**

可使知 此出論語今借用之謂初受戒人
但可使其依律行持未可使閱律

藏知其所以從結戒之由蓋六羣比丘等皆
是大權示現曲為末世而示犯緣誠恐愚
者不遠認為實 **義學** 演教之師深入險途
事反生放縱 **義海** 故稱義學 **險途**
險者險阻途者途路 **鹿苑** 鹿苑去波羅奈
此翁三途惡道也 **鹿苑** 園十餘里是如
來昔與提婆達多俱為鹿王住處各統羣
鹿五百餘時國王吹逆原澤菩薩鹿王前

詣王曰大王校獵中原縱燎飛矢凡我徒
屬命在茲晨不日應與無所克膳欲次差
日輸一鹿王有割鮮之膳我廷旦夕之命
王善其言而回駕西羣之鹿更次輸命提
婆羣中有懷孕鹿次當就死白其主曰身
雖應死子未次也鹿王怒曰誰不保命姓
鹿歎曰吾主不仁死無日矣乃告急菩薩
鹿王曰王曰悲哉慈母之心思及未形吾今
代汝遂至王門國王問由鹿具答情王聞
歎曰我人身鹿也汝鹿身人也是悉放
諸鹿不復輸命即以其林 **鶴樹** 亦云鶴林
為諸鹿藪因而號曰鹿苑 **鶴樹** 如來出世
說法利生化緣事訖於娑羅雙樹間二月
十五日入涅槃雙樹皆悉變白猶如鶴色
故名 **波羅提木** 此翻別解脫律擲云別
如說修行於下下等九品諸惑漸次斷除
永不退故於諸煩惱而得解脫名別解脫
又見修煩惱其類各多於別別品而能捨
離名別解脫由惑漂沒三界有情為此先
因勤求別解脫又云隨順解脫此據乎
立名隨順有為無為二種果故又云保鮮
脫謂戒淨有智慧如一則 **中觀** 二乃 **瑜伽**
來保任必證涅槃故 **一則中觀** 二乃 **瑜伽**
中觀即龍樹宗世稱法性宗瑜伽即薩法
宗世稱法相宗以瑜伽師地論為宗故名
如此翻 **穴結** 凡者雜也 **結** 浮囊不洩
相應也 **穴結** 者不詳也 **浮囊不洩** 渡海
器也昔有商人持囊渡海海中羅刹從乞
浮囊其人與乃乞一半亦不聽許至乞

一絲亦不從願何故命在憂故浮囊若破
 則於海岸終不能到以喻持戒之人欲渡
 生死苦海設遇受染羅刹假求一願亦終
 不從何故命在成故戒若有破則溺生死
 苦海永無出期 **勿輕小愆還成最後之唱**
 是故獲戒若此 **聊陳一隅** 謂物有四隅舉
 如來涅槃令諸比丘以戒為師依戒而住
 故云最後之唱若輕細過放蕩無拘是違
 遺教非佛弟子 **聊陳一隅** 則以三隅
 反云勿輕也 **摩夷** 是云摩得勤如此謂
 也 **摩夷** 智母以其能生智故

卷一

僧寶果 即漏盡阿 **三慧自淑** 淑者善也和
 慧者一聞慧由從善知誠處得聞經律論
 以因聞故能生無漏聖慧 二思慧由能
 思惟經律論及從善知識所問法義皆能
 生於無漏聖慧 三修慧謂統已聞法慧

惟義趣即常隨順修習因 **七法財** 財者謂
 此修習能生無漏聖慧 一切眾生行此七法資
 種出世法財也若一信財謂信能決定
 受持正法以為佛道之糧 二進財謂未
 能見真諦理而一心精進求出世道以為
 成佛之資 三戒財謂戒為解脫之本能
 止防身口意之惡非以為成佛之資 四
 漸愧財漸者漸天愧者愧人謂既五聞財
 則不造諸惡業以為成佛之資 二十六

關為三慧之首聞必能思思必能修若能
 聞佛聲教則開發妙解如說而行以為成
 佛之資 六捨財捨即捨施謂若能運平
 等心無憎愛想身命資財隨求給施無所
 吝惜以為成佛之資 七定慧財定慧即
 止觀也定則攝心不散止諸妄念慧則照
 了諸法破諸邪見 **不為施所墮** 昆尼母云
 以為成佛之資 **不為施所墮** 若不坐禪
 誦經營三寶事及不持戒 **有漏** 昆婆沙論
 受人信施則為施所墮 **有漏** 云有者若

業能令後生續生是名有漏漏者是留任
 義謂今有情留住欲界色界無色界故
 運樂經云有漏法有二種一因二果有
 漏果者是則名苦有漏因者是名為集 **艇**
 庭上聲小船也二百斛 **船** 音白海中
 以上曰艇其船小而長 **十使**
 一貪使七使使三癡使四慢使五疑使六
 身見使七邊見使八邪見使九見取使十
 成取使此十皆名使使邪見使九見取使十
 役行者心神流轉三界生死也 **四流** 一見
 三界見惑謂意根對於法塵起分別見也
 二欲流即欲界思惑謂五根貪愛五塵故
 名為思惑即貪瞋慢也三有流因果不亡
 為有即色無色界思惑貪慢是也四無明
 流無所明了故曰無明即三界思惑中之
 癡惑也此四皆名流者謂眾生由三惑之
 所流轉漂泊三界而不 **九地** 一五趣雜居
 能返於涅槃彼岸也 **九地** 一五趣雜居
 樂地三定生喜樂地四喜妙樂地五捨
 念清淨地六空無邊處地七識無邊處地

八無所有處地 生空 亦曰人空即我空也
 九非非想處地 生空 謂凡夫妄計五蘊是
 我強立主宰引生煩惱造種種業佛為破
 此計故說五蘊無我二乘悟之入無我理
 是名二我執 中強立主宰妄執為我與身
 俱生是名俱生我執 二分別我執謂於
 計我法中分別我能行善行惡等事而起
 執著是名 式義 此翻 躡 燕入聲 踰 跨也
 分別我執 式義 云學 躡 儒云學不躡等 鼻

祖人之懷胎鼻先受形然後諸根漸具故
 為諸部之始祖 苻 音成 舊草不艾 五通 一
 故曰鼻祖也 苻 新草又生曰苻 五通 足
 不履地謂身能飛行履空如地 二知人
 心命謂能知他人之心行善行惡生善處
 惡處 三回眼千里謂天下眾生之類若
 好若醜城郭屋舍山巖樹木回眼之時無
 有遠近皆悉能見 四呼名即至謂於天
 下男女及象馬巨細等聲無不能聞若有
 呼其名者或遠或近隨即而至 五石壁
 無礙謂於天下周旋往來山河石壁無所
 障 齋 音 後 九流 一儒流 祖述堯舜憲章
 出司徒也 二道流 絕禮樂去仁義獨任清
 虛者也 本出史官 三陰陽流 敬順昊天
 曆象日月本出史官 四法流 信任
 賞罰以輔禮制者也 本出理官 五名流
 名任不同禮亦異數出於禮官 六臺流
 推兼愛之意出清廟之官 七縱橫流 言

其當制宜受命而不受詞者也出於行人
 之官 八雜流 兼儒墨合名法出於議官
 九農流 播百穀勸耕 關 會 要
 桑者也出於農稷之官 關 也

附譯人傳畧

佛陀耶舍師罽賓國人婆羅門種也年十
 三出家嘗與其師遠行曠野逢虎其師欲
 走避師曰此虎已飽必不侵人俄而虎去
 前行果有噉嚼餘蹟其師密異之年十五
 日誦經二三萬言有羅漢重其聰明恒乞
 食供之嗣從舅氏習五明諸論世間法術
 靡不綜閑後受沙勒國太子供養待遇隆
 厚乃辭去東適龜茲尋羅什蓋什曾在沙
 勒國受學於師而師甚重之也時師被符
 堅執羈虜姑臧遣信要師師為國人留欲
 行不克因命弟子取淨水咒藥洗足乘夜
 而發走數百里始旦問弟子何所覺耶曰

惟聞疾風耳國人追不及方至姑臧而羅
 什又入長安長安乃秦主姚興也興聞師
 名即盛禮聘之師不受笑曰明旨既降便
 應載馳然檀越待士既厚脫如羅什見處
 則不敢聞命蓋興嘗媵妾逼什故也使還

覆興歎其幾慎重信敦諭師方允至長安

日興自出候延於逍遙園中遂與羅什出

十住經并四分律長阿舍等經也師儀容

端雅而髭赤色尤善毘婆沙時人號赤髭

毘婆沙既為什之師亦稱大毘婆沙後還

外國不知所終 媵音胤送女從嫁也凡送皆曰媵

竺佛念師涼州人弱年出家志業清堅外

和内朗有過敏之鑒少好游方備貫風俗

華梵音義莫不兼通故義學之譽雖闕洽

聞之聲甚著符氏建元年入長安與僧伽

跋陀曇摩難提等翻譯諸經三九斷疑字音
 義自世高支謙以後莫踰也故在姚苻二
 代為譯人之宗關中名德咸嘉推焉後復
 自出菩薩瓔珞十住斷結及曜胎中陰等
 經始就治定意多未盡遂爾邁疾卒于長
 安

毘尼止持會集卷第二

謙二

清金陵寶華山弘律沙門讀體集

七別解戒相者蓋前五門是推演教義第六門是分別題目教義題目既已朗然則當正解戒相凡諸沙彌受持十戒以為具

謙二

一

戒之基本已登壇近圓時重在白四羯磨感發戒體次乃為說戒相保護其體故今將釋戒相明持先出無作戒體無作者天台大師云戒體者不起而已起則性無作假色磐公釋云謂此戒體不起則已起則全性而性修交成必有無作假色無作一發任運止惡任運行善一作之後不俟再作故云無作文言無作假色者十一色法各有假實就法處所攝色中唯定果色名為實色表無表色並名假色善惡二戒各

有表及無表表即名作無表即名無作今且釋善戒互跪翹勤名為身表三說乞戒名為語表眾僧和合同集戒場亦名身表白四羯磨亦名語表由此作法受得清淨戒體成比丘性為意家所緣任運恒得止行二善故云一作之後不俟再作名為無作假色也此無作戒體從第三羯磨畢時便得於一切男女邊得不婬色於一切情非情邊得不盜色於一切有情邊得不殺色於一切有情邊得不欺誑色乃至於一切地得不掘色於一切草木得不壞色於一切酒得不飲色如是二百五十戒法一一各周法界故出家功德經明一日一夜持戒功德不可窮盡正由此妙善戒法徧以法界為所緣故是則無作戒體是法處

色是無漏色有漏五蘊色身為依無漏五蘊戒身為依有漏色身從父精母血和合而生是色處假色無漏戒身從三師七證羯磨而得是法處假色所以和尚名為力生正從能生戒身以得名耳得此戒身便同僧寶能使天龍尊奉神鬼欽承邇來授受體則迷而莫知相則晦而罔諳欲企道基堅固梵行精瑩何可得焉故今先出戒體而令授受不虛保護清淨也

次正解戒相准律分八初波羅夷法二僧伽婆尸沙法三不定法四尼薩耆波逸提法五波逸提法六波羅提提舍尼法七眾學戒法八滅諍法

初波羅夷法共有四條僧祇律云波羅夷者義當極惡謂更無事重於此者總以三

義釋之一退沒由犯此戒道果無分故二不共住非但失道果而已不得於說戒羯磨二種僧中住故三墮落捨此身已墮阿鼻地獄故

律云犯波羅夷者譬如有人截其頭終不能還活斷多羅樹心終不復更生長如針

鼻缺不堪復用如大石破為二分終不可

還合多羅此云岸形直而且高葉可書經此樹若斷其心即便枯死永不發生

根本律云波羅市迦者是極重罪極可厭

惡嫌棄不可愛若苾芻亦纔犯時即非沙

讀二

三

門非釋迦子失苾芻性乖涅槃性墮落崩

倒被他所勝不可救濟如截多羅樹頭更

不復生不能鬱茂增長廣大故名波羅市

迦

律攝云波羅市迦者是極惡義是他勝義

纒犯之時被梵行者所欺勝出家近園為
除煩惱今破禁戒反被降伏又能害善品
使消滅故又復能生惡趣之罪故名波羅
市迦又被非法軍而來降法王之子受敗
於他既失所尊故名他勝近園者謂淫
樂受比丘戒則

能親近淫樂
故名近園

薩婆多論云波羅夷者名墮不如意處如
二人共鬪一勝一負犯此戒者不聽懺悔
畢竟永墮負處又如焦穀種雖種良田勤
加澆灌不生苗實犯戒亦爾雖勤加精進
終不能生道果苗實故

佛說犯罪輕重經云犯波羅夷罪如他化

自在天壽十六千歲墮泥犁中按論云人
問一千六

百年為彼
天一晝夜於人間數九十二萬一千六百

萬年此年數必譯
快音義中辨此泥犁即熾熱地獄謂

獄卒置罪人鐵城中火然焦爛燒炙衆生
故此但名其有間若謗三寶五逆等罪壽
一大劫墮八無間獄也

第一姪戒

姪者污穢交邁鄙陋不堪之事名非梵行
亦名不淨行准善見云此是性罪不受佛
戒世間法爾有罪以犯佛戒則重犯國禁
則輕輕者國制強奸者斬和奸者笞姪男
者杖重者佛制不論男女等一有樂欲心
行姪則墮三塗窮劫極苦非同世刑不可

言喻

若比丘共比丘同戒若不還戒戒羸不自悔
犯不淨行乃至共畜生是比丘波羅夷不共
住

緣起蓋心隨境轉戒依事制若境幻心空

則情忘理顯所以戒結五篇皆由有漏生起而大聖乘時制為學處故善見律云未有漏者如來結戒衆生生誹謗想云何瞿曇沙門如諸聲聞弟子悉是貴姓或是王位捨於財物宮殿妻子眷屬不惜身命皆是知足無所希求云何瞿曇反以波羅提木义繫之是瞿曇未善別世人故言如此若結戒者世人亦不生敬重之心譬如醫師未善治病見人始欲生癰未大成就輒為破之破已血出受大苦痛以藥塗之瘡即還復醫謂曰我為汝治病當與我直病人答曰此癡醫師若是我病可為我治我本無病強為破肉令血流出生大苦痛反責我直詎非誑耶聲聞弟子亦復如是若先結戒而生誹謗我自無罪強為結戒是

卷二

五

故如來不先結戒若有漏者是時如來當為諸弟子結戒文以是義故每戒之下先出緣起又制戒之後復有緣起而加制者亦有緣起而開制者故五篇之內有一制數制之不同今此婬戒有三制律云佛在毘舍離時迦蘭陀村須提那子持信堅固出家為道時世穀貴乞食難得須提那子將諸比丘詣迦蘭陀村乞食母聞子歸往勸捨道還家再三不允乃令與婦安子使種不斷便捉婦臂將至園中三行不淨時須提那子行不淨已常懷愁憂同學問知其故具白世尊世尊集諸比丘以無數方便訶責言汝所為非非威儀非沙門非淨行非隨順行所不應為汝須提那云何於此清淨法中乃至愛盡涅槃與故二行不

淨耶告諸比丘寧以男根著毒蛇口中不持著女根中何以故不以此緣墮於惡道若犯女人身壞命終墮三惡道何以故我無數方便說斷欲法斷於欲想滅欲念除散欲熱越度愛結我說欲如火如把草炬亦如樹果又如假借猶如枯骨亦如段肉如夢所見如履鋒刃如新瓦器盛水著於日中如毒蛇頭如轉輪刀如在尖標如利戟刺甚可穢惡佛訶責已與諸比丘結戒集十句義一攝取於僧二令僧歡喜三令僧安樂四令未信者信五已信者令增長六難調者令調順七慚愧者得安樂八斷現在有漏九斷未來有漏十正法久住若說戒者當如是說若比丘犯不淨行行姪欲法是比丘波羅夷不共住此是創制也

兼二

六

如是結戒已時有跋闍子比丘愁憂不樂淨行即還家共故二行不淨行諸比丘白佛佛集僧訶責云汝癡人犯波羅夷不共住若有餘比丘不樂淨行聽捨戒還家若欲復出家於佛法中修淨行應度令出家受大戒由此更結不還戒戒羸不悔之語此是第二制也後復有一乞食比丘依林中住與雌獼猴共行不淨按行比丘見已白佛如上集僧訶責乃更結共畜生之文此是第三制也准僧祇律云佛成道五年冬分第五半月十二日中食後因須提那子制此姪戒按西域分三際從十二月十六日至四月十五日為春際從四月十六日至八月十五日為夏際從八月十六日至十二月十五日為冬際一際四月每四月有八箇半月今准此方正當十月二十七日也律攝云由癡故因姪煩惱及姪事故制斯學處

兼二

六

然以一切煩惱皆依無明不覺故生無明
 即癡也所以一一戒中佛莫不訶云汝癡
 人所為非而癡實是犯戒之根源也 又
 結戒必要集僧者准薩婆多論有五義一
 佛現不自專輒二佛不集眾籌量輕重而
 後結戒但共眾和合令罪者心伏三如國
 王持國雖得自在凡有國事與諸忠臣議
 之國得入住佛法王亦爾雖於法自在為
 持佛法故凡有法事集眾共知法得入住
 四以為肅現在當來弟子凡是僧事不問
 有力無力要問眾詳宜不得專獨五諸佛
 法爾不獨一佛 又集僧已佛知而故問
 知時而問知而故問者一以佛常法二以
 佛無事不知欲令前人伏罪順自言治法
 三以為安眾生故佛無事不知無事不見

若不問前人自以知見說罪過則眾常
 懷怖懼不能自安非是集眾安眾法四
 若以逆察人心非大人聖主儀體知時而
 問者要在比丘眾中問沙彌白衣前不問
 一以今是結戒時 又云一切善法不言
 結何以但言結戒然戒是萬善之本但結
 戒即結一切善法也

釋義文分三節若比丘是泛指受持具戒
 之人下皆共比丘下正明所犯之事是比

丘下結成所犯之罪按智度論云比丘義

初得戒即言比丘以三羯磨發善律儀破
 惡律儀故言破惡若通就行解戒防形非
 定除心亂慧悟想虛能破見思之惑二佈
 魔義既能破惡魔羅念言此人非但出我
 界域或有傳燈化我眷屬空我宮殿故生
 驚怖通而言之三處亦怖三乞士義乞是
 乞求之名士是清雅之稱出家之人內修
 清雅之德必須遠離四邪淨命日居福利
 告求資身以成清雅之德
律明八種比丘